

拙作敬呈

夢覺老前輩部曹指診

晚生南海沈瑛



佛山鄉志序例

佛山忠義鄉志序例

輿地志

沿革

舖四沙附

界至

街道附戶口

形勢

墟市

地脈

橋

山

津渡

川

杜氏通典曰凡言地利者在辨區域徵沿革察土風三者其大要已四庫提要省府縣志俱屬地理故志以輿地爲首吾鄉袤十里廣七里封域不大而山川之錯峙形勢地脈之盤鬱內而舖舍星羅街市櫛比與夫戶口之繁盛塵肆之駢連水陸交通津梁互接屹然爲海內巨鎮滋生既久較昔倍增所當及時蒐討者舊志鄉域分立十三門風土屬之鄉俗於例亦合惟事體繁雜不能不區其門類俾歸畫一漢書地理溝洫各爲一志諸史多因之爰倣其例提出水利一門增外河界至內外基圍及溝渠公井各條立水利志以田畝附屬內圍里社則改隸祠祀本志分各舖爲三部詳載街道添注戶口析山川爲二餘悉如其舊復分別繪圖裝入志

壹

首庶圖書並用不至履其地而茫然矣漢蕭收何秦圖籍因以知山川險要及天下戶口之數遂佐高祖定天下其有關係如此地据省會上游又當兩江之衝籌兵行水均於是焉賴生斯土者其可不預爲講求也哉人傑地靈物華天寶白埠呈圖忠義是保作輿地志第一

水利志

內涌界至

外河界至

基圍

田畝附

纜路

寶

渠道

公井

潦期

潮期

周禮稻人掌稼下地而講水利後世坡堰之設塘渠之浚實昉於此粵地濱海佛山據省會上游潮汐所到西北兩江由佛出省河入海以數里之地而受數千里或千里之水不爲之備不其魚乎畫野伊始引海水環境爲涌遂成沃壤舊志言之詳矣而海線遠近及境內隄基概不記載非有備無患之道夫三代後治水之法不外堵洩二策全恃隄基爲保障若寶若纜路亦與隄相輔而行

培厚增卑不嫌下策在以時修利而已至於溝渠綺注并幹雲連亦資生資養所在失時不治疾病叢生尤市鎮所亟應講求者蓋水爲地之血脈積淤既去血脈流通雲上於天自能致雨凡諸建設不惟備潦亦以救旱云河渠溝洫史漢並稱宣防有道迄用經營作水利志第二

建置志

內政

縣 司法

警察

團局

各分局更練附

議會

自治會

保安局

潔淨局

消防隊

水龍

水車

軍政

防軍

游擊隊

碉樓

礮台

商團

忠義鄉團

交通

郵政

電政

路政

航政

建築

屬內政

式

舊衙署

舊汎卡

鄉約

三王不襲禮五帝不沿樂而建設之事起焉夫所謂不沿襲者祇在儀文度數之間大旨不外因時度地盡乎人治之道而已我國自三代以來法制大備而道器悉具莫如周官一書泰西諸國得其意而不襲其迹變通盡利馴致富強其名者禮俗信義多與中王同比較得失亦判然矣光緒中朝廷銳意維新改設十大部命戴鴻慈等五大臣考察政治歸成列國政要一書於是斟酌損益擇其合乎國勢民情與我禮教不悖者次第推行天下拭目而觀新政易不云乎輦用黃牛已日乃革操之過蹙國事遂不可問昔人謂利不百不興害不什不除豈無爲哉今且變本加厲矣而所行新政固猶是光緒朝舊制也凡建置以內政軍政爲大交通舊隸兵部建築舊隸工部亦前志所有故彙爲一志若教育則在地方爲學堂財政則在地方爲賦稅農工商則在地方爲實業事體繁重故各爲一志其他慈善祠祀風土建於部政者亦建置之屬

既各爲一類不復雜陳此編志之大畧也吾鄉雖小部政所及幾於具體而微爰撰爲此志上溯本源明其沿革俾後之數典勿忘所自焉惟皇錫極建中於民禮時爲大何舊何新作建置志第三賦稅志

圖甲 稅則 雜稅 糧局 稅廠

志例有賦役名目自一條鞭法行併役於賦故改題賦稅志禹貢一書爲賦稅之祖周官益詳國家度地居民設官分職凡諸建置皆資財用不能不取之於民記曰君者所養也非養人者也此古今通義也然必取民有制亦必能保民然後能取民名實有違大亂以起歷代裨政滋多而莫甚於明季丁糧分科同於兩稅民安得不逃亡民逃其上國事去矣順治中頒發賦役全書量賦之多寡定役之繁簡康熙朝詔滋生人丁永不加賦雍正初詔丁隨地征有賦始有役乾隆朝并停編審民尤便之良法美意曠古未有其他雜稅亦祇就土地所出定其額貢無甚苛求軍興以後搜索

叁

無藝雖田不加賦而增耗羨設釐金浮於正供鄭漁仲曰名色之求罔民百出初謂暫行久爲成法今之謂矣光宣間議者欲按地問糧免釐加稅二者於國計民生均有裨益迄未舉行近以新政疊興需財孔亟畫分國家稅地方稅界限未嘗不清而地方用途無定附加名目亦無定大率照額征起加計惟就舊額所應有表而出之毋爲吏胥所欺詐以盡我民之義務而已佛山堡分爲八圖皆土著後來僑籍附戶亦有限制縣署稅則至今通行凡有錢糧者尤當知曉爰輯要成編以糧局稅廠附惟上好仁惟下好義各盡乃職天下斯治作賦稅志第四

教育志

佛山學堂 師範講習所 公立各小學 民立各小學

女學 義學 教育會 勸學分所 教會學校 學塾

附 書院 汾江義學 社學 詩社

國家之治亂視乎人才之消長而人才必出於學校此古今中外

不易之理也我國學制肇自義軒三代以來其法寢備朱子序大學一篇言之詳矣自秦縛束其民舉古制而芟夷之學子遂無所措而猶令以吏爲師亦未嘗禁民習法律也漢唐以來以詞章取士學者以是應教者卽以是爲教非早歲通籍不能肆力於羣藝間有特達之士亦其得天獨厚能自得師故能出爲世用國家賴以撐拄此天之不亡中國非區區若庠若監二三儒學教習之設遂能得人也自海禁大開中外無間考其政教類能講求實用人才皆出於學校亦有儒先崛起其間儒先見史記匈奴傳用是雄長寰區我國因以不競豈非人才之得失學制脩明不脩明之故哉光緒朝預備立憲首重教育京師建大學堂各行省郡邑以次興學奏定章程頒行天下於是學務爲之不振論者或以變古爲疑不知分科立教卽三物六藝之寄也循序升學卽家塾黨庠術序國學之大小相維也比年考校而積分行藏脩息游而時間定教之數聲上日教之數與方名而幼稚有學教於宗室教於公宮而女子有學

其備如此則今之興學謂之復古可也外國得其意而興我則禮失而求諸野又何嫌焉吾鄉爲繁盛市鎮學制得與府縣同光緒季年遵部章改書院爲學堂自是各學相繼而起或官立或公立或私立皆以畢業爲期限又有勸學分所教育分會提挈鼓舞雖未能較若畫一而大致可觀矣近且女學臨立專脩學塾亦如法改良足補公家之不逮其教會學堂設立在前按其學科與部章同故人多入焉此吾鎮學務之大較也明魏提學廢淫祠爲書院而文化興今改書院爲學堂於義較近其未改者或結爲詩社亦保存國粹之一道且教科所應有也從此人才輩出爲國宣勞大我中華卽基於此而要其指歸必以禮義廉恥爲範圍孝弟忠信爲根本道藝之林圖書之府鄒魯濱海匪今振古作教育志第五實業志

農業

農務分會

試驗場

田畝

圍館

農產品

桑市

菜市 瓜菜種市 繭市 蠶種市 猪種市 魚市
魚欄 蜆蚶欄 鷄鴨貓狗市 花園 農時

工業

工藝廠 私立工廠 各行工業 製品附

商業

商會 銀行 郵政儲金局 各行商業 商品附 商報

古稱四民農工商居其三農者物產所從出有工以爲之製造則物無不成器商則懋遷有無使農工皆受其利生人日用賴之以濟者也農用八政自古綦詳周禮考工逮於冬官司市以下逮地官者凡十二屬鄭商弦高載在盟府三者並重如此漢始裁抑商人工執藝事不廁於搢紳其樸者長爲農夫以沒世民生國計將安賴哉我國鑒於前弊闡發實業設專部以維持之各行省亦分設勸業道豈惟挽回利權實亦規復古制學部農工商皆設專科授特職昔之士首四民今則無一而非士崎輕崎重胡爲者鎮地

扼三江上游七省貨物皆取道佛山然後運出各省故商務爲天下最而土產之美手工之巧亦爲遠近所貴自五口通商洋船攬載而商窘洋米攬奪而農窘洋貨充斥而工窘僥焉不可終日然而土沃民勤先疇之賦畝如故也治良弓燥高曾之規矩如故也賈平貨阜世族之所嚮如故也邇者水陸交通百昌日出果能因其固有隨事改良亦未始無振興之一日爰照部章分爲三業凡農之屬八工之屬八商之屬八各以官立公立局所爲綱縷晰條分輯爲此志俾營業者有所考焉田園市肆基布星羅孰司制產康阜我歌作實業志第六

慈善志

倉儲 善堂 育嬰 救傷會 卽紅十字會 外國醫院 茶亭

石路 棲流所 義山

古者不矜言施與周禮六行孝友居首睦婣次之任恤又次之其時風俗醇美視慈善事爲尋常無足誇異厥後世變風移去古漸

遠見有慷慨任俠者爭表彰而傳之以勵薄俗義蓋有取粵省善堂林立甲於他省我佛山亦代有建設近益踵而增之凡夫濟人利物之舉靡不次第擴張中西兼備辛亥後省佛連年被兵卒獲安堵說者謂慈善之報焉書曰作善降之百祥作不善降之百殃理固然也舊志隸於鄉事叙列尙簡今從新采輯依類詳載編爲一門夫事以積久而遞增善亦因時而感發苟無災患捍禦何功非甚飢寒解推奚貴先後百年間漸推漸廣豈昔人好善不及今人歟於此見世道之升降而人心之維繫其補救良足多也保息諸政自古綦詳行道有福厥類惟彰作慈善志第七

祠祀志

官祀

敕賜靈應祠

敕封忠義流芳祠

烈士祠

報恩祠

忠勇祠

義烈祠

民祀

尊孔會

羣廟

里社

厲壇

寺

觀

各國教堂

洪範八政其三曰祀周禮掌之春官其在志書以延祐四明志祠祠門爲最善祠者廟之通稱分別官祀民祀祭法所載謂之祀典若非其封內之祭卽載在祀典亦屬民祀此古今通義也吾鎮官祀靈應祠爲重流芳祠亦公同鼎建皆特邀封典檔案可稽英烈所垂百世未墜於是報恩忠勇義烈諸祠相繼而起間或未登奏報而以勞定國以死勤事例得建立專祠皆官祀也文廟大祀非民間所能私立而莘莘學子瞻拜惟虔官祀用丁祭民祀用誕祭本可並行不悖治教休明實基於此中祀以下得援此爲例若是者謂之民祀其不在祀典者例應淘汰而民誠所寄屢獲休徵且經縣志收載自應照存里社本官祀而位秩次於羣廟故附焉鄉中多無主之祀俗謂之義祠卽古之厲壇爲祀事所應有因其教不易其俗可已儒無宗教之名而釋道則各標一幟於是乎有寺觀足增名勝亦滌塵囂故記載不廢道祖西去佛氏東來與耶穌

自西漸東各抱行教志願通商以來教堂林立保護之列景教遺碑中外同寶自唐已然況在今日此又義在兼收者也綜斯而論宜有專編爰稽其類自官而民自中而外都爲一志題曰祠祀或故事有徵及建修碑記足備掌故者散附於後亦志例也子曰務民之義敬鬼神而遠之可謂智矣斯則編志之用心也夫明有禮樂幽有鬼神民義既盡我用肇禋作祠祀志第八

氏族志

氏系 遷徙源流官閣附

祠堂 舊志墳墓

三代上氏族掌之史官左傳史記考核惟謹自餘諸史皆畧而氏族諸書代有著錄此亦志書所宜詳也鄭漁仲作氏族畧蒐輯諸書自漢鄧氏官譜至大唐姓系路淳衣冠譜不下數十種大都以地望爲主官族之貴由來尙已遷徙有後先官閥仍以時代爲序無大小無敢慢也我佛山肇迹於晉勝於唐貞觀間土人姓氏到今罕聞宋南渡後中原文物流入嶺南有遷至佛山者明初編立

圖甲先到諸族得占籍爲地著逮正統間黃蕭養作亂圍佛山義士梁廣等二十二人合當地八圖人民擊退之敕賜忠義鄉蔚爲天下巨鎮自是遠近相宅茲土閭閻相望氏族之繁不可勝紀南海衣冠之氣亦以吾鎮爲盛舊志鄉俗有氏族家廟墳墓三類凡郡望官閥遷徙源流具有條理足備百家掌故距今將近百年日益昌熾世家大族蟬連鵲起鄉望鄉事均有關係因提出此條別立專門次以祠堂墳墓於類族辨物之中寓合敬同愛之意詩曰洽比其鄰婚姻孔云如或遇之矣義門仁里蔚爲國華義軒以後同慶一家作氏族志第九

風土志

四禮 鄉飲酒禮

氣候

語音

習尙

月令

坊表

古蹟

名流故宅

古塚

名勝

園林

昔者先王陳詩以觀民風物土之宜而布其利而風土稱焉自是紀載之文其限於方隅者率以風土名篇莫休符桂林風土記范

致明岳陽風土記其著者也今考莫記風土多至六十餘條范記於郡縣沿革川原改易故蹟存亡靡不詳加考證實具志之全體非風土之所能盡康對山武功志舉其大者分隸地理建置諸志物產風俗則視乎其地之所有而各爲之歸論者稱善是風土爲地志之一部於稽其類宜立專門舊志有鄉俗門專記風土爲類十四可謂詳盡惟四禮采自府志他鄉所同鄉飲惟佛山歲一舉行典亦隆重故添鄉飲酒禮提出氏族家廟墳墓三條立氏族志又提出會館物產二條入實業志佛地聲明文物不亞會垣流寓諸賢亦多名蹟故添名流故宅一條藝文志舊收詩賦雜作散附名勝園林各類亦武功志例也餘悉如其舊一鄉風物於是畧備記曰入境而問禁入國而問俗入門而問諱吾人幸生斯土食舊德服先疇可不勉自樹立以爲邦家光也哉四鎮並稱我得福地土物心臧勉副忠義作風土志第十

鄉事志 編年

起明洪武元年迄民國十一年

鄉事卽大事記原本龍門各志因之其表以旁行斜上爲率究非紀事正式紫陽綱目要例凡四曰首歲以紀年而因年以著統大書以提要而分注以備言爲通史不易成法志如通史例得倣行舊志用直表有綱有目較他志稱善惟自道光庚寅至今將近百年事變諸多其大者以紅巾踞佛洋兵入境兩事爲至要光宣之交廷議立憲多所制置逮入民國頻遭喪亂吾鄉實當其衝雖獲安全而樁柱維持端資羣策他如災祲水旱及天象示變人事遞嬗凡有關於吾鄉者皆當遠紹旁搜俾成信史抑志有年表猶史有年紀卽本紀斷代爲史故以本紀冠全書志屬輿地故年表在後據四庫提要論列地志山川風土及諸建諸皆在輿地範圍職官人物其附屬也有年表則諸志有所統匯又編次之大意也今遵紫陽義例續編成志事在道光庚寅以前悉如其舊庚寅以後擇其有可徵信者次第書之未敢仰參筆削亦惟先民是程云爾書名鄉志故以鄉事名篇仍舊貫也年經事緯歷史胥

同識大識小用備折衷作鄉事志第十一

職官志

職官統表 名宦列傳

書曰唐虞稽古建官惟百周禮叙官首曰設官分職此班氏百官公卿表所自昉歷代國史所以有職官志也自是省府縣志及鄉之有志者無不以職官爲重第志與史異史備一代之官制志則叙其服官斯土者而止而叙事則較史爲詳唐制百司官廳皆有壁記著其履歷卽周禮御史掌在位名次遺法故制不必備而姓名占籍任期注於是官之下凡在任久暫某事屬之某官皆一覽而得文簡事具莫此爲善又按大清會典職官之賢者入祀名宦故有名宦傳陸清獻靈壽志名宦卽於職官中臚列事實不立專門提要稱焉爰師其意先表後傳合爲一志庶觀表而知宦制之沿革讀列傳而知民心之所嚮述往事勸來者於政教實有裨益親民惟吏親吏惟民往踐乃職期於作新作職官志第十二

九

選舉志

科目

進士 武進士 舉人 武舉人 貢生 文學 武學

舊志監生

仕宦

文職 武職 職銜 封贈 徵辟 襲蔭

唐重科舉故唐書有選舉志其例但志興革不錄人名各史同求其備載不遺獨賴方志馬端臨作選舉考立舉士舉官兩門條理簡貴各志因之吾鄉自明始有志科名仕宦亦自明始爰逮有清宏才彌劬炳炳琅琅燦在方冊矣軍興以來捐保多濫光緒朝廢科舉改官制已非昔比自人民國名稱尤繁又五方雜處稽核難周兼是數因不得不酌定選格量予限制茲編仍照馬氏通考立二大綱曰科目曰仕宦科目自庠生以上監生有舊管無新收學堂畢業宣統前有舉人生員學位應照前志彙編民國後無前項

名目議自中學校以上三年畢業照文憑按級分叙同等各學以次比例仕宦一途實官經到部到省無論正雜大小如前開載虛銜封典斷自五品以上某案得保某案納捐照札報明以杜冒濫舊有從未照存民國實官亦以級叙昔之翎枝今之獎章不收徵辟襲廕自爲一冊彰曠典也凡此皆所以重名器勵人才較前志畧嚴較縣志已從寬矣而自渙成邱不得不爾實則一隅之地收及僑籍與省志無異不得以小部分視也夫世祿匪貴叔孫見重於魯邦通德相承顏氏遂稱於江左所謂不朽在彼不在此宋留壁記明重監碑世濟厥美英茂紛馳作選舉志第十三

人物志

名臣 循吏 儒林 文苑 忠義 宦蹟 武畧 義行

孝友 隱逸 耆壽 貨殖 藝術 流寓 方外

列女 賢淑 節孝 貞烈 孝義

自太史公變編年爲列傳歷史因之於是有人物志顧志與史異

拾

史有大傳有分門傳其名位大者無大善亦無大惡概入大傳餘視其時代之所有分門而爲之傳若奸佞叛亂及閹豎伶人之蠹國者亦立傳以著其惡此史例也志則登美不登惡故有分門傳無大傳畧與史同其爲患鄉邦者事見編年志或雜志此又志與史之別也舊志列傳十二門條目亦備而名實所在今昔稍殊有應增補改併者試約言之如洗桂奇理學名儒勞勩亦文行名海內皆清秩閒曹服官未久列入循吏似未能權其所重應補立儒林傳以位兩賢勞孝與勞潼並祀鄉賢所著書有功經傳亦應同入此傳武功名傳志例罕見邑志有忠義傳元本晉史於我鄉尤合且所載卽敕封忠義官如梁廣梁懋善梁積厚均應改隸此傳捍災禦患以死勤事者入焉循吏不世見忠義亦未易稱應倣省志通例立宦蹟武畧二傳文武仕宦有所表見矣地贈見選舉志舊志地贈傳六人夷考其行或馳聲文苑或隱逸泉林內行篤於門庭義聲聞於鄉國封贈以子孫貴以此立傳殊失本旨應各視

所長分隸各傳商戰時代貨殖傳不可不立果能挽回利權行誼無虧可入此傳賢如端木才如范蠡白圭清節如巴寡婦安在闕闕中無人才也流寓舊與職官同編應改照通例自爲一傳大清一統志本土人物之外另志流寓主客對待不以先後論也佛山之名緣始東晉叢林既立厥有高僧故立方外傳凡爲傳十有六增補者五改併者三餘悉如其舊斬於善繼善述而已曰人物大清一統志例也曰志陸清獻靈壽志例也湏鬱炳靈世載其英敢云甄別實用經繩作人物志第十四

藝文志

經史子集

文以載道尙已晉司馬彪作藝文志後人收入班書分經史子集四大部遂爲歷史志藝文者所不易體尙簡古載書名卷數朝代撰人名而已及晁氏讀書志陳氏書錄解題始撮舉序例四庫提要每書必論列得失卽解題故事此志藝文所以兼收序例也而

其提綱必以司馬志例爲主若散錄篇章則近於選本舊志以文體分類非史志正式且先雜作後書目亦嫌倒置因更定體例以書目爲綱排次其文系於是書之後俾有歸宿有序則補錄在前無則闕若其人並無著述則其文散附各類之下以風土志爲多康對山武功志例也吾鄉代有人文著錄亦富自遭喪亂舊本罕存今就通志邑志搜輯多種及各家刻本接續前志類次成編仍以四部分目雖未臻完備庶幾較若畫一云冠冕文章肇通南極汾洛搜珍典冊是式作藝文志第十五

金石志

金石

歷史不載金石自梁元帝輯有碑英百二十卷文字於是平傳宋鄭樵通志立有專門若王象之之輿地碑目陳思之金石叢編爲金石入地志之始此金石所以自爲一志也惟一鄉之地所得無多舊志以吳荷屋中丞家藏石刻補之西安碑林取自各省亦其

先例此外所收多祠廟工程記又年代太近且有同時者故同治續縣志譏之而名人手筆亦復不少爰倣武功志例以其文散附各類之後仍擇其近古者條撮歟識彙爲目錄列入本志又取李氏七十二窓樓梁氏寒香館諸石及道腴書屋法帖與吳氏金石彙纂入志庶訪碑者得所依據而吾鄉文獻亦因以不朽未始非志乘之光也義紐倉書信今傳古佑我斯文厥有呵護作金石志第十六

鄉禁志

告示 目錄二十三條不具錄

國家有法律因有號令古者司寇掌邦禁率其州長黨正與民談法卽鄉禁所自始有清承歷代之舊州縣各立申明亭拆毀者罪之所以禁民爲非者備至故夫有通行之禁令有特設之禁令特設者各視其鄉俗之所宜以爲世守求之憲政而合不以今昔殊也舊志有鄉禁一門皆關鄉中利弊由士民請官核定刊載碑石

拾貳

彙纂成編用意深遠第以年代爲次往往一事兩禁隔越編幅尋檢不便因次第其目列于志首及其書旁凡各類之有禁示者注明是類之後新收者附焉例如明法指掌其詳也蓋慎也不必以吏爲師惟以去籍是懼歸吾視諸故府視此而已治法治人相須爲用穆穆科條九鼎同重作鄉禁志第十七

雜志

靈異 軼聞 古物 文餘

昔劉向綜羣書而奏其七畧有雜家者流後人因之作雜志凡無類可歸者入焉誠善法也舊志有雜錄一門條理亦密今提出釋道數條立方外傳懶園四子改隸陳雲麓太史傳後神廟故事則散系於各廟之下餘靈異各條悉仍其舊添軼聞古物文餘三條華銜附注亦足以觀今昔之變而備見聞之助矣自干令升作搜神記而靈異彰王子年作拾遺記而軼聞顯齊有喬木漢有故劍古物留詒永世用寶詩餘曰詞經餘曰緯文章流裔充類可求若

斯之屬事雖同於據拾義有取於勸懲無稽之談不敢闌入蓋其慎也品珍搜寶委筴罔虞雜而不越說文轉注後序祭酒我師作雜志第十

志序

李志 陳志 吳志 本志紀年議 後序 校勘記

孔安國曰序所以明作者之意也古者書必有序夏商諸書各有小序冠篇首是爲序書之始周禮序官所屬各職系於各官之下是爲目錄之始司馬遷作史記師其意分書表紀傳各有分序標題下詳列子目又作自序一篇綜括全書而作者之意益明杜預左氏春秋始作例言王弼注周易作畧例自是體例大備著作家因之志例如史惟史則各爲一書志則合新舊爲一書而義例以新志爲主又新志既出舊志卽不刊行所恃以窺見原書之大畧者序例而已吾鄉志有三李志已佚止存序一篇說一篇陳志全書具在吳志錄其序文入藝文志條例從畧竊以謂禮樂不相沿

拾叁

襲孔子作春秋亦不盡依魯史其屬詞比事因文見義三傳各有發明卽今之按語也毛西河春秋屬詞比事一卷卽春秋例言章實齋文史通義有自注一條卽按語吳志本陳志今志又本吳志凡門類之增併編次之後先不必悉如其舊既有按語發明不啻如見原書矣第門類既多不能較若畫一爰取現存舊志所有總序分序及其例言條目悉數登錄俾後人得窺全豹且可循是以知沿革之故既不沒前人之用心善繼善述籍是稍慰云洙泗春秋本因舊史紹我前脩式觀立始作志序第十九合卷首爲二十終焉

按志書以體例爲重門類既分所有志內各類序明志首謂之序例見章實齋文史通義九江朱氏家譜序例最詳原本諸史又揚子法言十三篇約其要旨揭諸篇首間句用韻文義最古班書序次列傳全首用韻亦本揚子爰倣其意序例後括爲韻語所以收束前文審定篇次揚班是冒此是結春秋無達例求是而已全書出版尙須時日因

抽出各志序例檢印成帙與卷首目錄先供衆覽全志大
畧亦於是乎備

癸亥季夏志局同人識

古籍电子书

欢迎您的光顾

网址：<http://www.xy980.net>

QQ:77815100 电话:15879335110

联系制作：古籍电子书工作室